

HOOFBESTUURSVERGADERING VAN DIE HISTORIESE GENOOTSKAP VAN SUID-AFRIKA

'n Hoofbestuursvergadering van die Historiese Genootskap van S.A. is op 22 September 1962 in die Hoër Volksskool, Heidelberg, Transvaal, gehou. In sy verwelkomingsrede het die Voorsitter, dr. J. J. van Tonder o.a. daarop gewys dat die Historiese Genootskap 'n daadwerklike poging wil aanwend om die kultuur-historiese agtergrond van ons Volk te bewaar.

Ander sake wat die aandag van die vergadering geniet het, was o.a. die volgende:

Wapen- en Ere-penning

Die ontwerp van 'n eie Wapen en Ere-penning vir die Historiese Genootskap, is reeds deeglik ondersoek. Dit word in die vooruitsig gestel dat hierdie aangeleentheid eersdaags tot finaliteit gevoer sal word.

Museumwese

Verteenwoordigers van verskillende plaaslike komitees in Transvaal, Kaapland en Natal, het die vergadering meegedeel dat die Genootskap nog steeds aktief werksaam is. Die algemene gevoel is dat die kultuur-historiese musea van die natuurkundige musea geskei moet word. Daadwerklike pogings is dan ook al op sommige plekke in dié verband aangewend of word die idee van gespesialiseerde musea verwelkom.

'n Verblydende teken is dat daar 'n ontwakende belangstelling in die bewaring van oudhede te bespeur is. So bv. het die Stadsraad van Vereeniging alreeds 'n lokaal vir die uitstalling van oudhede beskikbaar gestel. Op Heidelberg (Tvl.) het die N.G. Kerk die Kelderkamer vir hierdie doel ingerig, terwyl die hele aangeleentheid die ernstige oorweging van die Stadsrade van Heidelberg (Tvl.), Vanderbijlpark en Meyerton geniet.

Uniforme Geskiedenisleerplan

Die vergadering het die mening uitgespreek dat daar gepoog moet word om hierdie aangeleentheid so gou moontlik te finaliseer.

Plaaslike Inisiatief

Die vergadering het besluit om pogings aan te wend ten einde tak-komitees van die Historiese Genootskap oral in die Republiek en S.W.A. gestig te kry. Sodoende kan plaaslike inisiatief in belang van die Vaderlandse Geskiedenis aangewakker word. Dit kan o.a. geskied deur:

- a. jaarliks 'n byeenkoms van 'n populêre aard te organiseer waardeur die publiek se belangstelling in Geskiedenis aangewakker kan word;
- b. uitstalling van geskiedkundige aard te hou en die stigting van plaaslike museums aan te wakker;
- c. vertellings deur ou mense en die geskiedenis van die dorp op skrif te stel, asook enigiets van historiese aard op die voorgrond te bring;
- d. volksfeeste te organiseer waar dit ontbreek.

Sloping van historiese geboue

Die vergadering voel dat daar 'n wakende oog oor die sloping van ou historiese geboue, veral dié van kerke, gehou moet word. Die geskiedenis van ons kerke en die uitbouing daarvan, behoort meer aandag te geniet.